

Nunatta Qitornai

Inatsisartuni



02.april 2019

UPA2019/120

Inissianik attartortitsisarneq pillugu Inatsisartut peqqussutaata § 60-ip allannguutissaanik kingusinnerpaamik UKA 19-mi saqqumiusseqqullugit Naalakkersuisut peqquneqarnissaanik inatsisartut aalajaangiiffigisassaattut siunnersuugut. Taamaalilluni attartortup toqukkut qimagunnerani utoqqat illuanulluunniit nuunnerani inoqutigiinni najugaqartut inigisaminnik anisinnerqarsinnaanerannik pitsaanagerusumik illersorneqarsinnaasunngorlugit. Uani ilanngullugu § 60, imm. 2, uniffiup appaa peerneqassasoq, taamaalilluni aamma § 60, imm. 1 aamma 2 allanngortinneqassasut ukiut marluk najugaqarnissamik piumasaqaataasup qaammatinut arfinilinnut allanngortinneratigut.

(Inatsisartunut ilaasortaq Aleqa Hammond, Nunatta Qitornai)

Nunatta Qitornaanit pingaartilluinnarparput innuttaasut toqqissisimasumik inuuneqarnissamik pisinnaatitaaffiat ataqqilluinnarneqassasoq, aamma inissaqarniarnikkut. Namminerisamik illumik peqanngikkaanni imaluunniit inissiani attartortittakkaniikkaanni pingaaruteqarpoq aamma tassani inigisaqarneq ullormiit ullormut annaasinnaaneranik pinngitsoortitsiniarluni ineqartutut piareersimasuarnissaat qulakkeerinnissimanissaallu. Innuttaasup inoqatini, aappani imaluunniit angajoqqaani toqukkut qimaguppat, napparsimalerpat imaluunniit utoqqaat illuanut pippat imatut aaqqissugaassanngilagut taava illoqatai anisitaasussanngussallutik. Pingaaruteqarput inuiaqatigiittut malittarisassaqaassasugut innuttaasunit peqataaffigineqarsinnaallutillu toqqissisimatitsisunik.

Siunnersuuteqartoq tunngivilersuummini aapparit ukiuni arfineq pingasuni sulisunut inissiami uiusumit pissarsiarineqarsimasumi najugaqatigiissimasut, inissiamut attartortittakkamut nalinginnaasumut allatsissimanissamik piumasaqaateqartoqarmat, inissiamik attartortittakkanut nalinginnaasutut tigusisimannngitsut assersuutigai, tamannalu Naalakkersuisut ilumuunngitsutut unnerpaat. Erseqqissaassutigineqarpoq inatsimmi § 21, imm. 2 2006-mili allanngortinneqarluni tulluarsarneqareersimasoq.

Taamaakkaluartoq siunnersuut ataatsimut isigissagaanni siunnersuuteqartoq aamma Naalakkersuisut isumaqatigiipput inatsisip nutartertariaqarnerani suliakkiutigineqartullu ataatsimut isigalugit isumaqataaffigineqartut oqaatigineqarlunilu Naalakkersuisuniit suleqatigiissitaqartoq inatsisartut upernaakkut 2020-mi ataatsimiinnissaannut saqqummiussissamaarlutik. Suliarooq aallartereernikuuvoq siunnersuuteqartutullu piffissaliussatut taaneqartoq angumerineqarsinnaanani.

Isumaqarpugut Naalakkersuisut isumaqataangunik siunnerfik pillugu suliniarnermilu piffissaq aporfiuppat allannguutissatut siunnersuusiunnarsimasinnaangaluartut naaperiuteqarlutillu.

Nunatta Qitornai

Inatsisartuni



Siunnersuut amerlasuutigut pitsaasunik imaqartoq nalilerparput ineqarnermilu ataatsimiititaliamit suliarineqarnissaa inassutigalugu tassuunakkut allaannguuteqarluni siunnersuuteqarnikkut naaperiartoqarsinnaaneq aqutissiuullugu.